

# Angutit arnallu naligiissitaanissaat pillugu Inatsisartut inatsisaat

## Kapitali 1

### *Inatsisip siunertaa*

#### *Siunertaq atorneqarfissaalu*

§ 1. Inatsisip siunertarivaa arnat angutillu naligiissitaanerisa siuarsarnissaat, ataatsimoortumillu isumaqatigiinniarnerni pisinnaatitaaffit assigisaat pitsaanerusulluunniit anguneqanngiffiini atorneqassalluni.

#### *Suiaassuseq pissutigalugu assigiinngisitsinerup inerteqqutaanera*

§ 2. Arnat angutilluunniit suaiaassusaat pissutigalugu toqqaannartumik toqqaannanngitsumillu assigiinngisinneqarnissaat inerteqqutaavoq.

*Imm. 2.* Arnani angutinilluunniit peqqusiileqisitsineq kinguaassiuutitigulluunniit peqqusiileqisitsineq aammattaaq inerteqqutaapput.

#### *Nassuiaatit*

§ 3. Inuk suaiaassutsini pissutigalugu inummit allamit allatut suaiaassusilimmit assigisaanik atugaqartumit ajornerusumik pineqaraangat, allatulluunniit piniarneqaraangat toqqaannartumik assigiinngisitsisoqartarpoq. Aammattaaq naartunermi, erninermi meeravissiartaarnermilu kiisalu erninerup meeravissiartaarnerullu kinguinnguanut atasumik sulinnginnermi pitsaanngitsumik assigiinngisitsinerit tamarmik toqqaannartumik assigiinngisitsinertut isigineqartarput.

*Imm. 2.* Aalajangersagaq, suleriaaseq assigisaaluunniit arlaannaannulluunniit attuumassuteqanngitsutut issorinartoq, suaiaassutsip aappaanik illua-tungaasumut naleqqiullugu ajornerusumik pinnittoqaraangat toqqaannanngitsumik assigiinngisitsisoqartarpoq. Tamanna suleriaaseq atorneqassanngilaq, aalajangersagaq assigisaaluunniit pissusiviusunik tunngavissaqarpat anguniakkallu inatsisinik malinnittup angunissaanut pisariaqartinneqarpat.

§ 4. Inuup ataqqinassusiata kanngunarsarnissaanik sunnuteqartumik siunertaqartumilluunniit, aamma pineqartumut qunusaarinnippaluttumik, akeqqersimaartumik, nikassarpassisumik, nikanarsarpassisumik nuanniitsumillu misigisimalersitsilluni inuup suaiaassusia inuk akuttunngitsumik,

naapertuutinnittumillu pineqaraangat peqqusiileqisitsisoqartarpoq.

*Imm. 2.* Inuk kinguaassiuutitut attuumassuteqartunik pissusilersuutit piumassuserinngisaanik nalaataqartinneqaraangat, inuup pineqartup kanngunarsarnissaanik, nikanarsarnissaanik, assigiinngisinneqarnissaanik imaluunniit nukillaarsarnissaanik sunniuteqartumik siunertaqartumilluunniit, kinguaassiuutitigut peqqusiileqisitsisoqartarpoq.

## **Kapitali 2**

### *Nalunaaruteqartarnerit pisortallu oqartussaasuisa akisussaaffiat*

**§ 5.** Pisortat oqartussaasuisa suliaqarfimmik iluanni pilersaarusiornerminni ingerlatsinerminnilu naligiissitaaneq tamatuma attuumassuteqarfignissaanni atortussanngortissavaat, aamma pilersaarusiornerminnut ingerlatsinerminnullu ilanngullugu.

*Imm. 2.* Suliffeqarfiit pisortallu oqartussaasui 20-t sinnerlugit sulisoqartut, sulisumik suaassutsikkut agguataarnerat aammalu naligiissitaanerup siuarsarnissaanut sulisutigit anguniakkatigit suliniutit pillugit ukiut allortarlugit Naalakkersuisunut nalunaarusiortassapput naatsorsueqqissaarnermut atugassanik.

*Imm. 3.* Nalunaarusiap qanoq ittuunissaanut Naalakkersuisut erseqqinnerusunik malittarisassiorsinnaapput.

*Imm. 4.* Imm. 1-imi, 3-milu aalajangersakkat Kalaallit Nunaanni naalagaaffiup oqartussaasuinut atuutinnigillat.

## **Kapitali 3**

### *Ataatsimiititaliat, siulersuisut il.il.*

**§ 6.** Pisortat ataatsimiititaliaat, siunnersuisoqatigiivi, isumalioqatigiissitaat assigisaallu, inuiaqatigiinnut pingaaruteqartut malittarisassaasa aalajangersarnissaannik piareersaasussatut pilersaarusiortussatulluunniit Naalakkersuisunit pilersinneqartut, imatut inuttalersugaassapput, suaassutsit arlaat aapparminnit ilaasortamik ataasiinnarmik amerlanerussuteqassallutik.

**§ 7.** Naalakkersuisut siulersuisuinut, sinniisoqarfinnut aamma assigisaanik ataatsimoorussamik aqutsisoqatigiinnut ilaasortamik toqqaasuutillugit, toqqaaneq ima ingerlassaaq suaassutsit arlaat aapparminnit ilaasortamik ataasiinnarmik amerlanerussuteqassallutik.

*Stk. 2.* Siulersuisunut, sinniisoqarfinnut aamma assigisaanik ataatsimoorussamik aqutsisoqatigiinnut ilaasortat ilaannaannik Naalakkersuisut toqqaasussaattillugit, imm. 1-imi aalajangersagaq eqqarsaatiginagu Naalakkersuisut ima toqqaasinnaapput, ataatsimoorullugu aqutsisooqatigiit arnat angutillu naligiimmik agguassimanerat ersersillugu.

**§ 8.** Oqartussaasut kattuffiilluunniit, siulersuisunut, ataatsimiititalianut il.il., tak. §§ 6-7, ilaasortassanik inassuteqartartut, Naalakkersuisunit tamakkiisumik ilaannakortumilluunniit toqqarneqartussaasunik, angummik arnamillu siunnersuuteqartassapput. Ilaasortat amerlanerusut siunnersuutigineqassappata, angutit arnallu amerlaqatigiit siunnersuutigineqartassapput.

*Imm. 2.* Oqartussaasut, kattuffiit il.il. imm. 1-imi aalajangersakkamik avaqqutsisinnaapput, immikkut ittunik pissutissaqarunik, taamaattoqarpallu pissutaasoq tunngavilersorluagaasoq Naalakkersuisunut

nassuiaatigissallugu.

*Imm. 3.* Aalajangersagaq naapertorlugu inassuteqaateqartoqanngippat, Naalakkersuisut inassuteqaammik atuisariaqanngillat. Taamatut pisoqartillugu oqartussaasut kattuffilluunniit pineqartoq nutaanik inassuteqassaaq. *Imm. 2* naapertorlugu tunngavilersuutaasoq akuersaarneqarsinnaanngippat assigisaa atuutissaaq.

**§ 9.** Qinersinerit tamarmik kingorna siulersuisut, ataatsimiititaliat, il.il. §§ 6-7-inut ilaatinneqartut inuttalersugaanerit pillugu paasissutissanik naatsorsueqqissaarnermut atugassanik Naalakkersuisut piniartassapput.

*Imm. 2.* Paasissutissat katersorneqartut tamanut saqqummiunneqassapput.

#### **Kapitali 4**

*Suliffeqarneq eqqarsaatigalugu arnat angutillu naligiimmik pineqarnissaat*

##### *Naligiissitsineq*

**§ 10.** Sulisitsisoq kinaluunniit, angutininik arnanillu sulisoqartoq, atorfnitsitsinerimi, nuutsitaanermi, atorfimmik qaffatsitsinerimi sooraarsitsinermilu naligiisitsisassaaq, aamma sulinerimi aningaasarsiatigullu atugassarititaasunik assigiissunik atugaqartillugit.

**§ 11.** Naartuneq, erninerimi sulinngiffeqarneq meeravissartaarnerluunniit pissutigalugit sulisitsisup aningaasarsiortoq soraarsissinnaanngilaq, imaluunniit naartunerimi, erninerimi meeravissartaarnermilu sulinngiffeqarneq ullormusiallu pillugit Inatsisartut Inatsisaat naapertorlugu aningaasarsiortup sulinngiffeqarnissaminik piumasaqarsimanera pissutigalugu soraarsissinnaanagu.

*Imm. 2.* Piffissaq aningaasarsiortup sulinngiffeqarnini pissutigalugu peqanngiffigisimasaa, tak. naartunerimi, erninerimi meeravissartaarnermilu sulinngiffeqarneq ullormusiallu pillugit Inatsisartut Inatsisaat, suliamut pissutsini qanoq sivilutigisumik sulisimanerup naatsorsorneranut ilanngullugu naatsorsuunneqassaaq. Aalajangersagaq sooraarnerussutisiaqarnermut pissutsinut attuumassuteqanngilaq.

*Imm. 3.* Angajoqqaat sulinnginnissamut pisinnaatitaaffimminnik atuisimasut, tak. Naartunerimi, erninerimi meeravissartaarnermilu sulinngiffeqarneq ullormusiallu pillugit Inatsisartut Inatsisaat, suliatoqqaminut, imaluunniit suliamut assigisaanut imminnut ajornerunngitsumut uteqqinnissamut pisinnaatitaaffeqarput, aamma suliffimmi atugassarititaasut suugaluartulluunniit pitsanngoriarsimanerannut, peqannginnermik nalaanni pisinnaatitaaffigisimasaraluminnut iluaquteqarsinnaatitaallutik.

**§ 12.** Sulisitsisoq kinaluunniit, angutininik arnanillu sulisoqartoq, inuussutissarsiutitigut siunnersuineq, inuussutissarsiutitigut ilinniartitaaneq, inuussutissarsiutitigut pikkorissaanerit, ingerlaqqittumik ilinniarnaq allamillu ilinniartitaaneq eqqarsaatigalugit naligiissitsisassaaq.

*Imm. 2.* Kikkulluunniit namminersorlutik inuussutissarsiornissamut, sulinermik inuussutissarsiortut sulisitsisulluunniit kattuffianni kattuffimmiluunniit assigisaani ilaasortaanissamut akuersissuteqarnermik aalajangiisartut tamarmik naligiissitsinissamik pisussaaffeqarput. Naligiissitsinissamik pisussaaffik aamma imm. 1-imi taaneqartutut siunnersuinerimik ilinniartitaanermilluunniit suliaqartunut tamanut atuuppoq.

**§ 13.** Atorfinititsinermi imaluunniit inuussutissarsiutigut ilinniartitaanermi il.il. suaassutsit aalajangersimasut pissarsiariniarneqarnersut imaluunniit piumaneqarnerunersut ussassaarutini allassimassanngilaq.

#### *Aningaasarsiat assigiit*

**§ 14.** Sulisitsisoq kinaluunniit sulianut assigiinnut sulianullu assinganik naleqartutut isigineqartunut arnanut angutinullu assigiinnik aningaasarsiaqartitsissaaq, aningaasarsiatigut atugassarititaasut ilanngullugit.

*Imm. 2.* Suliap nalingata nalilernera pissaaq piginnaasat attuumassuteqartut pissutsillu allat attuumassuteqartut ataatsimoortumik nalilernerisigut.

**§ 15.** Sulisitsisup aningaasarsiaqartoq soraarsissinnaanngilaa, pineqartup assigiimmik aningaasarsiaqarnissaaq imaluunniit aningaasarsiatigut atugassarititaasut assigiinnissaannik piumasaqaateqarsimanera pissutigalugu.

### **Kapitali 5**

#### *Immikkut ittumik akuersissutit*

**§ 16.** Kalaallit Nunaanni Naligiissitaanermut Siunnersuisoqatigiit tusarniareernerisigut § 2, imm. 1-imi aalajangersakkamit Naalakkersuisut immikkut ittumik akuersissuteqarnissaaq aalajangersinnaavaat. Suliniutip siunertaviata angutit arnallu periarfissaasa naligiissinneqarnissaannik siuarsaanerunera nalilersuinermi pingaartinneqassaaq.

**§ 17.** Kalaallit Nunaanni Naligiissitaanermut Siunnersuisoqatigiit oqaaseqaataannik piniareerlutik, §§ 10, 12-13-imi aalajangersakkanit Naalakkersuisut immikkut ittumik akuersissuteqarnissamik aalajangersinnaapput. Suliaqartitaasussap aalajangersimasumik suaassuseqarnissaa inuussutissarsiutip ingerlannissaanut ilinniartitaanerulluunniit siunertaanut ilaansoq naliliinermi pingaartinneqassaaq.

### **Kapitali 6**

#### *Taarsiiffigitinneq kinguneqartitsinerillu*

**§ 18.** Inuit, inatsit naapertorlugu pisinnaatitaaffimmikkut, tak. §§ 2, 10-12 aamma 14-15, kanngunarsagaasimasut taarsiiffigineqarnissamut akuerineqarsinnaapput.

**§ 19.** Aningaasarsiortoq § 11 unioqqutillugu soraarsitaappat, sulisitsisoq taarsiissutitik akiliuteqassaaq. Aningaasarsiortup qanoq siviutigisumik atorfeqarsimanera suliamilu pissutsit allat aallaavigalugit taarsiissutit aalajangersarneqassapput.

**§ 20.** Aningaasarsiortoq § 14-imi unioqqutitsisumik aningaasarsiaqartoq imaluunniit aningaasarsiatigut atugassaqaartitaasoq, aningaasarsiat assigiinnigissutaasa annertoqataannik taarsiiffigitissinnaavoq.

**§ 21.** Naligiimmik pineqarnissamik piumasaqarneq, tak. §§ 10 aamma 12 imaluunniit assigiimmik aningaasarsiaqarnissamik piumasaqarneq, tak. § 15, pissutigalugit aningaasarsiortoq soraarsitaasimasooq taarsiiffigitissinnaavoq. Aningaasarsiortup qanoq sivilutigitisumik atorfeqarsimanera suliamilu pissutsit allat eqqarsaatigalugit taarsiissutit aalajangersarneqassapput.

**§ 22.** Inatsimmi §§ 10-13-mut unioqqutitsisoqartillugu akiliisitaanermik pineqaatissiisoqarsinnaavoq.  
*Imm. 2.* Inatsisartut inatsisaat malillugu akiligassiisoqarnissaanik tunngavissaqarpat, inatsisitugit pisinnaatitaasut pisussaataasullu Kalaallit Nunaanni Pinerluttulerinermi inatsisit naapertorlugit akiliisitaasinnaapput.

## **Kapitali 7**

### *Uppernarsaasussaataaneq*

**§ 23.** Inuk §§ 2, 11-15 naapertorlugit eqqunngitsumik pineqarsimasutut imminut isigiguni, pissutsinillu piviusunik toqqaannartumik toqqaannanngitsumilluunniit assigiinngisitsisoqarneranik isumaqalersitsisunik saqqummiussisinnaappat, taava naligiissitsinissamik tunngaveqarnerup avaqqunneqarsimannginnera illuatungiusup uppersarsaasertussanngussavaa.

*Imm. 2.* Inuk naligiimmik pineqarnissamik piumasaqaammik, tak. § 15, saqqummiussinermi kingorna kingusinnerpaamik ukiup ataatsip ingerlanerani soraarsinneqarpat, suliffeqarfimmut tunngatillugu soraarsitsinerup tunngavissaqarluarnera sulisitsisup uppersarsaasertussaavaa.

**§ 24.** Inuk naartunerminik sulisitsisumut nalunaarnermi, tak. § 11, imm. 1, kingorna soraarsitaappat, soraarsitsinerup naartunermut attuumassuteqannginnerata uppersarsarnissaa sulisitsisup pisussaaffigaa.

## **Kapitali 8**

### *Atorsinnaanngiffii*

**§ 25.** Inuup inatsisit naapertorlugit pisinnaatitaaffini iperaannarsinnaanngilai.

*Imm. 2.* Aalajangersakkat inatsimmik eqqortitsinngitsut, imaluunniit inuk inatsisit naapertorlugit pisinnaatitaaffimminik iperaaginnarsimatillugu, ataasiakkaanut ataatsimoortumilluunniit isumaqatigiissutinut, suliffeqarfiup iluani malittarisassanut kiisalu peqatigiiffiit il.il. malittarisassaannut ilaasut atorsinnaassuseqanngillat.

## **Kapitali 9**

### *Kalaallit Nunaanni naligiissitaanermut siunnersuisoqatigiit*

#### *Naligiissitaanermut siunnersuisoqatigiit pilersinnerat*

**§ 26.** Naligiissitaanermut siunnersuisoqatigiit naalakkersuinikkut arlaannaannulluunniit attuumassuteqanngitsut Naalakkersuisut pilersissavaat.

#### *Naligiissitaanermut siunnersuisoqatigiit suliaasaat*

**§ 27.** Kalaallit Nunaanni inuiaqatigiinni angutit arnallu naligiissitaanissaasa siuarsarnissaat Naligiissitaanermut siunnersuisoqatigiit suliassaraat. Pissutsit naligiissitaanermut tunngasut Naligiissitaanermut Siunnersuisoqatigiit qinnuigineqarnermikkut, imaluunniit namminneq suliniuteqarnermikkut misissorsinnaavaat.

*Imm. 2.* Naligiissitaanermut Siunnersuisoqatigiit makku sularissavaat:

- 1) Inatsisip atorineqarnera inuiaqatigiinnilu qanoq atuutsitaanera nakkutigalugu.
- 2) Naalakkersuisut apeqquteqaateqarnerisigut oqaaseqaateqartassalluni, tak. §§ 16-17. Oqaaseqaatit tamanit takuneqarsinnaassapput.
- 3) Ingerlatat paasisutisseerpalaartut oqallinnermillu pilersitsisartut aallartillugit.
- 4) Pisortat ingerlatsinerannut pisortallu suliffeqarfinut, suliffeqarfinnut namminersortunut inuiaqatigiinnilu inunntut ataasiakkaanut siunnersuisoqatigiittut suliqaassalluni.

*Imm. 3.* Naligiissitaanermut Siunnersuisoqatigiit saniatigut sularisinnaavai:

- 1) Pisortat suliffeqarfiini suliffeqarfinilu naligiissitaanermut sinniisunik ikiorsiineq.
- 2) Iliuutsit naligiissitaanermut tunngasut pillugit oqartussaasunut il.il. isumassarsianik siunnersuutinillu sularinninneq.
- 3) Suaassutsit inissisimaffiisa qangatoortut pitsaanngequtaasa allanngortinneqarnissaanik siunertaqartunik paasisitsiniaaneq.
- 4) Pisortat suliffeqarfiinik kattuffinnillu allanik, suaassutsimut attuumassuteqartumik persuttaasarnerup akiornanik siunertaqartunik suleqateqarneq.
- 5) Assigiimmik aningaasarsiaqarneq, suliffeqarnermullu tunngasuni ajornartorsiuteqarfiit suaassutsinik assigiinngisitsiffiusut allat sulissutigalugit.

*Imm. 4.* Naligiissitaanermut Siunnersuisoqatigiit ukiut tamaasa Naalakkersuisunut Inatsisartunullu nalunaarusiortassapput.

#### *Naligiissitaanermut Siunnersuisoqatigiit aaqqissugaanerat*

**§ 28.** Naligiissitaanermut Siunnersuisoqatigiit kattullutik ilaatigut makkununga tunngasunik tamatigoortunik ilisimasaqassapput:

- 1) Sulisoqarnermut tunngasuni pissutsit, tamatumani aningaasarsiaqartut sulisut sulisitsisullu pisinnaatitaaffii, pisussaaffii soqutigisaallu eqqarsaatigineqarlutik.
- 2) Meeqqat inuusuttut pisinnaatitaaffii soqutigisaallu, ingerlalluarnissamut, ineriartornermi, ilinniartitaanermilu atugassarititaasut ilanngullugit.
- 3) Suaassutsit inooqatigiinnikkut inuiaqatigiinnilu inissisimaffii, suaassutsit ataasiakkaat pisinnaatitaaffii, pisussaaffii soqutigisaallu ilanngullugit.

*Imm. 2.* Naligiissitaanermut Siunnersuisoqatigiit arfineq-marlunnik ilaasortaqarput, taakkunannga siulittaasoq ataaseq ilaasortallu sinneri arfinillit Naalakkersuisut toqqassavaat. Naalakkersuisut Naligiissitaanermut Siunnersuisoqatigiinnik inuttaliinerminni suaassutsit arlaannik aapparminnit ataasiinnarmik amerlanerusunik toqqagaqassapput.

*Imm. 3.* Siulittaasoq ilaasortallu sinneri toqqarneqartassapput piffissamut ukiunik sisamanik sivirususilimmut. Ilaasortaq toqqagaasoq tunuarpat, tunuartitaappat imaluunniit suliadini isumaginissinnaajunnaarpat, nutaamik toqqaasoqassaaq. Nutaamik toqqaasoqarnissaata tungaanut

ilaasortat ilaasortatut atuutissapput.

*Imm. 4.* Ataasiaannarluni toqqarneqaqqittoqarsinnaavoq.

**§ 29.** Toqqagassatut inassutigineqartut akornannit Naalakkersuisut siulittaasoq toqqassavaat.

*Imm. 2.* Kattuffiit aningaasarsiaqartunik sulisitsisunilluunniit sullissisut inassuteqarnerisigut Naalakkersuisut ilaasortamik ataatsimik marlunnilluunniit toqqaassapput.

*Imm. 3.* Kattuffiit, peqatigiiffiit, suliffeqarfiit il.il. meeqqanik inuusuttunillu sullissisut, imaluunniit meeqqat inuusuttullu pillugit suliaqartut inassuteqarnerisigut Naalakkersuisut ilaasortamik ataatsimik marlunnilluunniit toqqaassapput.

*Imm. 4.* Kattuffiit, peqatigiiffiit, suliffeqarfiit il.il. ilinniartitaanermik, atuarfinnik ilisimatusarnermilluunniit suliaqartut inassuteqarnerisigut Naalakkersuisut ilaasortamik ataatsimik marlunnilluunniit toqqaassapput.

*Imm. 5.* Kattuffiit, peqatigiiffiit, suliffeqarfiit il.il. suaassutsit inissisimaffinik imaluunniit suaassutsit ataasiakkaat soqutigisaannik pisinnaatitaaffinillu suliaqartut inassuteqarnerisigut Naalakkersuisut ilaasortamik ataatsimik marlunnilluunniit toqqaassapput.

*Imm. 6.* Piginnaaneqarfinnik § 28-mi taaneqartunik ataatsimik arlaqartunilluunniit toqqagassatut inassutigineqartut ilisimasaqarfeqassapput.

*Imm. 7.* Kattuffiit, peqatigiiffiit, suliffeqarfiit il.il. Naligiissitaanermut Siunnersuisoqatigiinnut toqqagassanik inassuteqaateqartut, tak. imm. 2-5, suaassutsinit marluusunit tamanit amerlaqatigiinnik toqqagassatut inassuteqaateqartassapput.

*Imm. 8.* Kattuffiit, peqatigiiffiit suliffeqarfillu suut siunnersuisoqatigiinnernut ilaasortanik inassuteqarsinnaanerat pillugu Naalakkersuisut erseqqinnerusunik malittarisassiorsinnaapput.

**§ 30.** Siunnersuisoqatigiinni ilaasortaq ukiut toqqagaaffusut sisamat qaangiutsinnagit Naalakkersuisut tunuartissinnaavaat, piumasaqaatit tulliuttut arlaat ataaseq eqqortinneqarpat:

- 1) Inatsisip malitsigisaanik suliassat sularinissaat ilaasortamit sakkortuumik sumiginnarneqarnerat.
- 2) Suliassat inatsimmi allassimasut ilaasortamit toqqassisimanartumik sularineqarnissaasa tatigineqarneranik annikillisaataaqisumik ilaasortaq iliuuseqarpat.
- 3) Ilaasortaq tunuartitaasussatut Naligiissitaanermut Siunnersuisoqatigiit ilaasortaanit sisamanit inassutigineqassaaq, Naalakkersuisullu misissuisoqareernerata kingorna isumaqarpata tunuartitsinissaq pisariaqartoq. Inassuteqaat allaganngortitaassaaq tunngavilersugaallunilu.

**§ 31.** Naligiissitaanermut Siunnersuisoqatigiit suliassatik naapertorlugit malittarisassatik namminneq aalajangersassavaat, tak. § 27.

*Naligiissitaanermut Siunnersuisoqatigiit allattoqarfiat*

**§ 32.** Naligiissitaanermut Siunnersuisoqatigiit namminneq allattoqarfisik ulluinnarni suliassanik isumaginnittussaq pilersissavaat.

*Imm. 2.* Namminersorlutik Oqartussani malittarisassat qaqugukkulluunniit atuuttut naapertorlugit Naligiissitaanermut Siunnersuisoqatigiit allattoqarfiup sulisuinik atorfnitsitsinissamut soraarsitsinissamullu pisinnaatitaapput.

### *Aningaasalersuineq*

**§ 33.** Naligiissitaanermut Siunnersuisoqatigiit Landskarsimit tapiiffigineqarnermikkut aningaasalersorneqassapput.

*Imm. 2.* Tamatuma saniatigut Naligiissitaanermut Siunnersuisoqatigiit suliainnut atugassaminnik suleqatigiiffinnut namminersortunut pisortallu oqartussaasuinut aningaasanik qinnuteqarnissamut periarfissaqarput.

*Imm. 3.* Naligiissitaanermut Siunnersuisoqatigiit suliassaqarfimmi iluini, tak. § 27, isertitaqarnermik kinguneqartunik suliaqarsinnaapput.

**§ 34.** Inatsisartunut, Naalakkersuisunut il.il. ilaasortat akissarsiaat pillugit Inatsisartut Inatsisaanni malittarisassat naapertorlugit, Naligiissitaanermut Siunnersuisoqatigiinni ilaasortat akissarsiaqassapput, ullormusiaqartinneqarlutik angalanermullu atasumik aningaasartuutininik taarsiiffigineqartassallutik. Aningaasartuutit taakku Landskarsimit ukiumoortumik tapiissutit iluini akilerneqartassapput.

### *Missingersuutit naatsorsuutillu*

**§ 35.** Naligiissitaanermut Siunnersuisoqatigiit ukiumut tulluuttumut missingersuutininik siunnersuummik Naalakkersuisunut siunnersuuteqartassapput. Siunnersuut isertitassatut aningaasartuutissatullu naatsorsuutigineqartut missingerneqarnerannik imaqassaaq. Peqatigisaanillu ukiumut tulluuttumut Landskarsip tapiissutaasa annertussusissaannut siunnersuut saqqummiunneqassaaq.

**§ 36.** Naligiissitaanermut Siunnersuisoqatigiit ukiumoortumik naatsorsuusiortassapput, taakkulu kukkunersuisumit piginnaatitaasumit kukkunersiorneqartassallutik.

## **Kapitali 10**

### *Atuutilerfia atorunnaarsitsinerlu*

**§ 37.** Inatsit ulloq 1. Januar 2014 atuutilissaaq.

*Imm. 2.* Ataatsimiititalianut siulersuisunullu tak. §§ 6-7, inatsisip atuutilerfiata kingorna tullianik inuttalersueqqinnermi aatsaat atuutilissaaq.

*Imm. 3.* Inuttalersugaanissaaq aqqissugaanerlu pillugit aalajangersakkat, tak. §§ 28-29, naligiissitaanermut siunnersuisoqatigiinnut aatsaat 1. Januar 2015 atuutilissapput.

*Imm. 4.* Tassunga peqatigitillugu uku atorunnaarsinneqarput:

Kalaallit Nunaanni Naligiissitaanermut Siunnersuisoqatigiit pillugit Inatsisartut inatsisaat nr. 5, 20. maj 1998-imeersoq.

Arnat angutillu naligiissitaanissaat pillugu Inatsisartut inatsisaat nr. 7, 11. april 2003-meersoq.



Aleqa Hammond

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut